



**Komunikadu Imprensa**  
**Distritu Aileu**  
**23 Fevereiru 2017**

**Komunidade Suku Hoho-lau premeiraves simu formasaun kona-ba sistema legal no krime relevante sira kona-ba fetu no labarik iha enkudramentu legal Timor-Leste**

Iha 15 Fevereiru 2017, Judicial System Monitoring Programme (JSMP), fasilita treinamentu ba komunidade iha Suku Hoho-lau, Postu Administrativu Aileu, Munisípiu Aileu.

Treinamentu ne'e partisipa husi ema nain 30 ne'ebé kompostu husi membru komunidade fetu 13 no mane 17. Partisipante sira ne'e mai husi Aldeia Manubatan, Mau-Ruria, Saharai, Aslimhati no Hatulai.

Treinamentu ne'e ho objetivu atu hasa'e koñesimentu komunidade injerál hodi enkoraja sira atu asesu ba sistema justisa formal no oinsa halo prevensaun ba krime iha sira nia komunidade.

Iha treinamentu ne'e, partisipante sira apresenta problema ne'ebé sira infrenta mak hanesan violénsia doméstika, violénsia seksuál no abuzu póder husi polísia iha Munisípiu refere bainhira halo atuasaun ba problema ruma iha suku Hoho-Lau.

“Atividade ne'e nu'udar forma ida atu sensibiliza komunidade sira-nia koñesimentu kona-ba sistema legal aplikavel no krime relevante sira ne'ebé dalabarak akontese iha sociedade, nune'e sira bele iha koñesimentu adekuada no hatene oinsa atu prosesu kuandu sira hasoru krime hirak ne'e,” dehan Luis de Oliveira Samapio, Diretór Ezekutivu JSMP.

Xefe Suku Sr.Orlando Maia iha ninia abertura haktuir katak komunidade Suku Hoho-lau falta tebes formasaun sira hanesan JSMP fasilita dadauk ne'e, tanba durante ne'e komunidade sira hanoin katak problema feen ho laen baku malu ne'e hanesan problema bai-bain deit.

Materia treinamentu ne'ebé apresenta durante sesaun treinamentu ne'e kobre kestaun igualidade jéneru, tipu krime iha natureza violénsia bazeia jéneru iha Kódigu Penál, Lei Kontra Violénsia Doméstika, konseitu baziku kona-ba direitos umanus, no oinsa asesu ba justisa formal.

Aleinde ne'e, JSMP mós apresenta kna'ar Juis, Ministériu Públiku, Defénsór Públiku, Advogadu Privadu no Polísia. JSMP mós enkoraja comunidade sira wainhira sai hanesan vítima ba krime ruma bele kontaktu organizasaun fetu sira atu bele fo assistensia hodi asesu ba justisa formal.

Durante treinamentu, comunidade sira fo atensaun masimu no ativu tebes iha diskusaun liuliu kona-ba oinsa atu asesu ba iha sistema justisa formal.

Aktividade ne'e realiza tanba hetan apoiu orsamentu husi Embaixada Canada iha Jakarta Indonezia.

Atu hetan informasaun kle'an favor kontaktu direktamente:

Luis de Oliveira Sampaio  
Diretór Ezekutivu JSMP  
Email: [luis@jsmp.tl](mailto:luis@jsmp.tl)